

四庫全書

子部

欽定四庫全書

羣書考索後集卷四十五

宋 章如愚 編

兵門

車戰

書曰武王戎車三百兩

周禮車僕有戎路廣車闕車革車輕車。大司馬教兵之法易野車為主。○車戰之法每車用甲士三人步卒

七十二人行則以車為衛居則以車為營一車之間又

有猝車

詳見後

周禮車僕曰凡師共革車各以其卒是也

武王問太公曰戰車奈何太公曰車貴知地形凡車之

死地有十勝地有八

詳見後

春秋初鄭伯之車僨于濟

隱三年

自後鄭以徒兵從事而

於車或缺

隱四年

曲沃武公伐翼逐翼侯於汾濕驂絰而

止

桓四年

邲之戰楚君之戎分為二廣晉申公巫臣于吳

教吳乘車由是吳通於上國

成七年

○齊侯伐衛有先驅

有申驅有貳廣有啓左翼曰啓有朕有大殿晉中行穆子禦狄于太原將戰魏舒曰彼徒我車所遇又阨乃毀車以為行大敗翟人而車戰漸廢戰國以來乃用騎兵而車猶有間見者晁錯以輕車突騎為中國之長技衛青與匈奴戰以武剛車自環為營李陵對單于亦以大車為營此車之用於西都者也

後漢光武造戰車可駕數牛上作數櫓置於塞上以拒

匈奴

靈帝之時陽璇為零陵守制車數十乘以禦賊此車用於東都者也

曹操新書攻車七十五人守車一隊共二十五人田豫與虜戰亦用車而戰

晉馬隆征羗八陣圖用扁廂車地廣則鹿角車營路狹則為木屋施於車上此車之用於魏晉者也

劉裕伐南燕亦以車四千乘為左右翼朱超石戰河上

以車百乘抱河為却月營魏大武北伐蠕蠕用車十五萬兩隋諸將與突厥戰皆戎車步騎相叅與鹿角為方陳此車之用於南北者也

李靖與太宗論兵法曰號蕩騎兵也戰鋒隊步騎相半也駐隊兼車乘而去也臣討突厥越險數千里此而未嘗敢易則唐固嘗用車矣

玄宗時哥舒翰節度隴右造戰車蒙以狻猊則唐又嘗用車矣至於房琯之敗遂以為用車不若用人與騎之

愈抑不知古者以馬而琯以牛車二千乘馬步夾之非其素習則敗之固宜此非車之不利而用之者非其道也

宋至和中韓琦言郭固造戰車約以古制其車前銳後方上置七鎗以為前後二拒行載兵甲止為營陳

春秋如韓原之戰輅秦伯將止之鞏之戰韓厥中御而從齊侯鄆陵之戰卻至遇楚子韓厥從鄭伯邲之戰楚子乘廣以逐趙旃用車以戰而使敵人便得與吾元帥

相接則是環衛之車不設也蓋古者車戰之法前後整齊必有護衛前後行列元帥未易動搖也至春秋中列國用之往往軍伍不整而元帥每以車逐利混然左右率無定法故敵人得以及之終春秋之世致敗者未有不由車戰之無法而輕動搖也惟繻葛之戰二拒用事若原繁高渠彌以中軍奏功未嘗輕動搖深得古法車戰再攷

車戰之法自夏啓誓御馬以正而勝有扈文王以戎車

既駕而服獬豸武王戎車三百兩虎賁三千人

書牧誓

宣

王以其車三千威蠻荆詩春秋魯僖公攻伐淮夷戎車
孔博衛文公元年革車三十乘季年乃三百乘宋華元
甲車四百六十乘魯威公之會諸侯有兵車有乘車楚
子為乘廣三十乘分為左右廣雞鳴而駕日中而說左
則受之日入而說是皆用車而制勝也

漢夏侯嬰破李田軍雍丘以兵車趣戰疾破之

本傳

灌

嬰以御史大夫將車騎別追項籍至東城破之

本傳

武

帝以輕車將軍公孫賀出雲中

本紀

衛青令武剛車自

環為營而縱五千騎往當匈奴

霍去病傳

唐裴行儉突厥阿

史德溫傳反行儉詐為糧車三百乘伏壯士五輩虜果

掠車中士突出殺獲幾盡

本紀

○李光弼在太原乃徹

民屋為櫺車二百人挽之石所及輒數十人死賊傷十

二

本傳

○馬燧為戰車行以載兵止則為陣討田悅燧

乃推大車焚悅將楊朝光柵破之

本傳

車戰之法

武王問於太公曰以車與騎步戰所當幾何公曰車者軍之羽翼也所以陷堅陣要强敵遮北走也易戰之法一車當步卒八十人八十人當一車一車當六騎六騎當一車十乘敗千人百乘敗萬人此其大數也置車之吏數五車而一長十車而一吏五十車而一率百乘而一將易戰之法五車為列前後相去四十步左右十步險戰之法車必循道十車為聚二十車為屯前後相去二十步左右六步隊間三十六步

五車一長縱橫相去一里各返故道選車士之法取
年四十以下長七尺五寸以上走能逐馬及馳而乘
之前後左右上下周旋能縛乘旌旗力穀八石弩射
前後皆便習者武車之士不可不厚也

太公
六韜

車戰之地

凡車之死地有十其勝地有八往而無還者車之死
地也越絕險阻乘敵遠行者車之竭地也前易後險
者車之困地也陷之險阻而難出者車之絕地也圯

下漸澤黑土黏埴者車之勞地也左險右易上陵抑
阪者車之逆地也殷草橫畝犯歷深澤者車之拂地
也車少地易與步不敵者車之敗地也後有溝瀆左
有新水右有峻坂者車之環地也日夜霖雨旬日不
止道路潰陷前不能進後不能解者車之陷地也此
十者車之死地也敵之前後行陣未定即陷之旌旗
擾亂人馬數動即陷之士卒前後相顧前往而疑後
恐而怯即陷之三軍卒驚皆薄而起即陷之戰於易

地幕不能解即陷之遠行而幕舍三軍恐懼則陷之

此八者車之勝地也

太公六韜

毀車而勝

晉荀吳敗無終及羣狄于太原將戰魏舒曰彼徒我車所遇又阨以什共車必克因諸阨又克請用卒自我始乃毀車以為行伍乘為三五為五陣以相離兩於前伍於後專為右角偏為前拒以誘之狄人笑之未陣而薄之大敗之

左傳昭元年

用車而敗

言車戰之利者莫如孫武故曰馳車千乘所謂馳車者以其車輕而可馳者也所謂革車者以其鞏於外而可以禦火攻者也至於唐房琯知馳車之為利而不知革車之為固此咸陽之戰所以卒敗於火攻也歟

總論車戰

言車戰於今日當以國初論不當以中興論是正與舟

師相反也大抵平地用車戰水澤用舟載國於東南者之不習於車猶國於西北者之不習於舟也太宗嘗曰戈權之戰南方所利見上高宗嘗曰江湖沮洳之地雖有車騎亦何用

紹興三年上曰近有獻車戰者朕謂在人不在車江湖沮洳之地雖有車騎亦何用

高宗之論車戰其猶太宗之論舟師乎雖然中興之初但為守計也雖不習車可也今日之治不但為守計也

不習車不可也是故當以國初論不當以中興論也今之為車戰者必當曰符彥卿之拒馬寨如之何而收其效見下米守信之寨腳車如之何而極其利

米守信知澧州遣李錫持新樣流星弩拒馬牌寨腳車山字甲八種來進

至則歛兵退則出兵自比於衛青必如田況之言而後可也

咸平四年吳淑請復古車戰之法衛青李陵田豫馬

隆皆以車而勝近符彥卿破敵陽城亦拒馬為行寨
夫匈奴所長者騎兵也苟非連車以制之則何以禦
其奔突哉故用車戰為便其制取常用車接其衡軛
駕以牛車上置槍以為外向列士卒於車外賊至射
之乃出騎兵擊之此制虜要術也戰之用車一陣之
甲鎧也故可以行止為營陣敵至則斂兵附軍以拒
之賊退則乘勝出兵以擊之出則藉此為所歸之地
入則以此為所居之宅故人心有依不懼胡騎之陵

突也

行載兵甲止為營陣比於馬燧必如郭固之式而後可也

至和二年韓琦言郭固就民車約古制為之臨陣禦敵緩急易集其車前銳後方上置七槍為前後二拒此馬燧戰車行載兵甲止為營陣也又以民車之廂增為重廂高四尺四寸用革輓之吳起所謂革車掩戶輓輪籠轂是也琦以為可用於平川之地臨陣以

折奔衝下營以為寨脚今令固自費車式進呈試之
以固為衛尉寺丞

有大車有小車山徑之蹊不可以用大車其無如范公
仲淹之策

范仲淹上仁宗議攻云延安之西慶州之東有賊界
百餘里侵入漢地唐馬燧造戰車行載甲兵止為營
陣此路山坡大車難進當用小車二十兩銀絹錢二
十萬賞有功將吏

有兵車有民車干戈之際不可用民車其無如沈公括之言乎

北兵將入境遣中貴人取兩河民車為備民大驚擾一日沈括立御座側神宗曰卿知籍車之事乎括曰車戰之利見於歷世臣但未知一事古人所謂輕車者兵車也今之民車重大以牛輓之日不能行三十里少蒙雨雪跬步不進故俗謂之太平車恐兵間不可用爾神宗喜曰無人如此語朕遂罷取民車

噫出車彭彭旂旐央央獫狁之襄易事也我車既攻我馬既同夷狄之不攘無有也如徒曰此唐人房次律之覆轍不可用得無因噎而廢食乎

林嗣文

舟師

黃帝堯舜剡木為舟剡木為楫

定四年吳王闔廬帥唐蔡之師以伐楚捨舟于淮汭自豫章與楚夾漢左司馬戎欲毀其舟武城黑謂子常曰吳用木也我用革也不如速戰乃自小別至于大別夫

緊王擊之三戰皆勝楚子昭王涉睢濟江入於雲夢之澤中國之用水戰自閻廬始哀九年吳城邗溝通江淮十年吳舟師自海入齊。張儀說楚王曰秦西有巴蜀治船積粟浮江而下不十日距邗關。襄公二十四年楚子為舟師以伐吳。昭十七年長江之戰楚獲吳乘舟餘皇。二十四年楚子為舟師以畧吳疆。

漢高帝遣韓信已定齊項羽使龍且將二十萬救齊王田廣與信夾淮水陣韓信乃夜令人為萬餘囊盛沙壅

水上流引軍半渡水信使人決壅囊水大至龍且軍大半不得渡即急擊殺龍且水東流遂敗走後信進兵擊魏魏盛兵蒲坂塞臨晉信乃益為疑兵陳船欲渡臨晉而伏兵從夏陽以木罌缶渡軍襲安邑魏王豹驚引兵迎信信遂虜豹定河東

服虔曰以木桺縛罌缶以渡也

武帝時有樓船有戈船有下濫有橫海江淮青齊皆有樓船軍有擊兩越救東甌則用江淮會稽樓船滅朝鮮

則用齊樓船又開昆明池以習水戰

武帝時東越數反覆朱買臣上言東越王居保泉山一人守險千人不得上今聞越王更徙南行去泉山五百里居大澤中發兵浮海直指泉山陳舟列兵席卷南行可破滅也上拜買臣會稽太守詔買臣到郡治樓船備糧食水戰具歲餘買臣受詔與韓說俱擊破東越

買臣傳

○元鼎五年南越反遣伏波將軍路博德出桂陽下湟水樓船將軍楊僕出豫章下潯水歸義越侯岩為戈船

將軍出零陵下離水甲為下瀨將軍下蒼梧咸會番禺
後漢光武伐蜀岑彭裝戰樓船數十艘吳漢以棹卒多
費糧穀奏罷之帝報曰大司馬習步騎不時水戰荊門
之事一由征南公為重岑彭裝直進樓船與冒突露橈
數十艘

直進取其有進而無退冒突取其冒突而敢前謂之
露橈則揖露在外而兵藏於舟中也

發桂陽零陵長沙三郡委輸棹卒凡六萬餘人會於荊

門後漢末關羽領兵圍樊呂蒙以大軍沂江襲其空虛
伏甲於舟更衣為商人以理征棹卒襲奪荊州曹操既
平劉表得所治水軍而吳孫權與操遇于赤壁周瑜亦
用蒙衝鬪艦數千艘以火攻之操軍敗走

三國劉備為曹公所破欲引兵南渡江與魯肅遇於當陽
遂合兵因進往夏口遣諸葛亮詣權權瑜及程普等與
備并力逆曹公于赤壁曹公軍引次江北瑜等在南岸
瑜部將黃蓋曰今寇衆我寡難與持久然觀操軍方連

船艦首尾相接可燒而走也遂同時發火操軍大敗

周瑜

傳

晉武欲伐吳令王濬作舟艦於益州其大艦方百二十步受二千餘人以木為城起樓櫓開四出門其上皆得馳馬往來後濬順流以舟直指建業遂平吳

太康元年杜預向江陵王濬唐彬擊破丹陽監盛紀吳人於江磧要害之處並以鉄鎖橫截之又作鉄錐長丈餘暗置江中以逆拒舟艦濬乃作大筏數十方百餘步

縛草為人被甲持仗令善水者以筏先行筏行遇鐵錐
雖輒著筏而去又作火炬長十餘丈大數十圍在船前
遇鎖燃炬燒之須臾融液斷絕於是船無所礙濬克西
陵杜預遣周旨等帥奇兵八百汎舟夜渡江吳孫歆曰
北來諸軍乃飛渡江也通鑑。桓玄求為廣州受命而
而不行豫州刺史庾楷以道子割其四郡遣其子說王
恭恭以告殷仲堪亘元推恭為盟主刻期同趣京師仲
堪悉以軍事委楊佺期使佺期率舟師五千為前鋒亘

元次之仲堪帥兵相繼而下佺期元奄至湓口王愉惶遽奔臨川元遣偏軍追獲之

東晉玄溫伐秦引舟自清水入河舳艫數百里至枋頭以水運路不通又戰數不利焚舟棄輜重鎧仗陸道奔還

安帝時劉裕伐南燕舟師自淮入泗裕大治水軍遣孫處沈田子自海道入番禺盧循兵守廣州者不以海道為虞孫處乘海船至即日拔其城劉裕遣朱齡石伐蜀

令齡石從外來取成都卒平蜀又裕伐秦使沈林子將水軍出石門自汴入河又使王仲德開鉅野入河裕將水軍自淮泗入清河沂河西上王鎮惡請率水軍自河入渭以趨長安乘蒙衝水艦行船者皆在艦內秦人驚以為神至渭橋舍船登岸大破姚弋於渭橋遂入長安元嘉北伐之師再舉皆自泗入河

魏元英攻徐州韋睿救之裝大艦為水軍以小船載草用火攻之魏軍大潰

梁湘東王命王僧辯等東擊侯景侯子鑒屯姑熟以拒西師景遣兵助之僧辯至子鑒帥步騎萬餘人度洲於岸挑戰又以舡舥千艘載戰士僧辯麾細船皆令退縮留大艦夾泊兩岸子鑒之衆謂水軍欲退爭出趨之大艦斷其歸路鼓譟大呼合戰中江子鑒大敗

通鑑

齊江陵不守霸先奉晉安王即位齊遣兵五千渡江據姑熟帝乃遣侯安都領水軍夜襲胡野燒齊船周鉄虎率舟師斷齊運輸齊兵大潰霸先將精甲自西明門出

擊之往采石迎齊援督兵疾戰燒柵齊人大潰盡收其
船艦齊兵還據石頭帝遣侯安都領水軍襲破之

陳武帝時徐嗣徽引齊人渡江據荊湖帝詔文育還都
嗣徽等乃列艦於青墩至於七磯以斷文育歸路及夕
文育鼓譟而發嗣徽等不能制而文育反攻之嗣徽驍
將鮑瑛獨以小艦殿文育乘單舫艣跳入瑛艦斬瑛仍
牽其人而還賊衆大駭因留船荊湖自丹陽步上時武
帝拒嗣徽於白城適與文育會將戰風急武帝曰矢不

逆風文育曰事急矣當決之何用古法抽槳上馬而進
衆軍隨之風亦尋轉殺傷數百人嗣徽等移營幕府山
文育徙頓對之頻戰屢敗

後梁王琳引合淝巢湖之衆舳艫相次而下陳侯瑱率
軍進戰檻洲明日合戰琳軍少却及夕東北風吹其舟
艦並壞夜中有流星墜于賊營及旦風靜琳入浦以鹿
角繞岸不敢復出時西魏將史寧躡其上流瑱聞之知
琳不能持久收軍却據湖浦以待其斃及史寧至圍郢

州琳恐衆潰乃率船東下去羌湖十里而泊明日齊人遣兵助琳瑱令軍中晨炊蓐食頓羌湖尾以待之將戰有微風至自東南衆軍施拍縱火定州刺史章昭遠乘平虜大艦中江而進琳軍大敗脫走以免者十二三。

閩中守陳寶應舉兵反據建安晉江二郡界水陸為柵陳將章昭達討之據其上流命軍士伐木帶枝葉為筏拍於其上綴以大索相次連營夾兩岸寶應數挑戰昭達乃按甲不動俄而暴雨江水大漲昭達放筏衝突水

柵盡破又出兵攻其步卒寶應大潰遂尅定閩中 歐
陽紇據嶺南反陳將章昭達督衆軍討之紇乃出頓涯
口多聚沙石盛以竹籠置于水柵之外用過船艦昭達
居其上流裝艦造拍以臨賊柵又令其軍人銜刀潛行
水中斫竹籠籠筏皆解因縱六艦隨流突之賊衆大敗
因而擒紇留異據東陽叛陳將侯安都奉詔討之異本
謂臺軍自錢塘江上安都乃步由會稽之諸暨出永康
異大恐奔桃枝嶺處岩谷間立柵以拒守安都躬自接

戰為流矢所中血流至踝安都乘輿麾軍容止不變因其山隴為堰屬夏潦水漲安都引船入堰樓艦與異城等放拍碎其樓異與其子脫身奔晉安

隋之平陳楊素造大艦名五牙容戰士八百人次名黃龍容五百人自餘平乘舴艋等各各有差則隋之舟師其可見者如此

楊素引舟師下三峽軍至流頭灘將軍戚昕以青龍百餘艘兵數千人守狼尾灘地勢險峭隋人患之素

曰若晝日下船彼見我虛實灘流迅激制不由人不
如以夜襲之素親帥黃龍數千艘銜枚而下素帥水
軍東下舟艫被江旌甲耀日陳人望之懼曰清河公
即江神也 通鑑

唐之討蕭銑孝恭以戰艦二千餘艘自夔發而東下則
唐之舟師其可見者如此

唐詔發巴蜀兵以王孝恭李靖統十二總管自夔州
順流東下以擊蕭銑孝恭帥戰人二千餘艘東下蕭

銑以江水方漲殊不為備孝恭等拔其荆門宜都二鎮進至夷陵銑將文士弘將精兵數萬屯清江孝恭擊走之獲戰艦二百餘艘銑出兵拒戰恭將擊之李靖止之孝恭不從自帥銑師出戰果敗走銑衆委舟收掠軍資靖見其衆亂大破之大獲舟艦李靖使孝恭盡散之江中銑援兵見舟艦疑不進

通鑑

梁王彥章攻晉晉人以鉄鎖斷德勝口彥章陰遣人具舟命甲士六百人皆持巨斧又令舟載蒲炭燒斷之因

以巨斧斬浮橋遂破南城

周世宗還自壽春以南方水軍敏銳於京城側開池造船艦數百艘招誘南卒教習北人水戰數月之後縱橫出沒無不可用者則五代舟師其可見者如此

晉以鐵鎖斷德勝口築河南北兩城號夾寨又取鄆州梁人大恐帝召王彥章為招討使段凝為副至滑州置酒大會陰遣人具舟於楊村命甲士六百人皆持巨斧載冶者具韃炭乘流而下彥章酒半佯起更

衣引精兵數千沿河以趨德勝舟兵舉鎖燒斷之以
巨斧斬浮橋而彥章引兵急擊南城遂破梁正明五
年吳越王錢鏐大舉討淮南以傅瓘為諸軍都指揮
使帥戰艦五百艘自東洲擊吳吳遣彭彥章陳汾拒
之傅瓘命每舡皆載灰豆及沙戰于狼山江順風揚
灰吳人不能開目因縱火焚吳舡吳兵大敗俘吳裨
將七十人斬首千餘級焚戰船四百艘梁賀懷攻德
勝南城以竹管懸鰲鼉十餘艘橫於河流以斷晉之

救兵使不得渡晉王軍於北岸不能通守將石延賞
告矢石將盡晉王積金帛於軍募能破艨艟者軍校
王建及進曰賀懷悉衆而來冀此一舉若我軍不渡
則彼為得計今日之事請死決之遂以巨索聯舟十
艘選勇卒三百人持斧鼓枹而行將至艨艟流矢雨
集建及使持斧者入賊艨艟間斧其竹竿破其垂楯
以稍刺之又以木罌載薪沃油燃火於上流縱之隨
以巨艦實甲士鼓譟攻之艨艟既斷隨流下梁兵焚

溺者殆半。顯德三年周太祖發大梁李谷攻壽州
久不克唐劉彥貞引兵救之又以戰艦數百艘趣正
陽為攻浮梁之勢李重進渡淮逆戰破之帝至壽州
營於淝水之陽徙正陽浮梁於下蔡鎮唐兵維舟於
淮營於塗山之下帝命擊之戰艦五千餘艘。張永
德屯下蔡唐將林仁肇等以水陸軍援壽春永德與
之戰肇以船實薪芻因風縱火欲焚下蔡浮橋俄而
風回敗退永德為鉄綆千餘尺橫絕淮流繫以巨木

唐兵不能近是時唐復以水軍攻之永德夜令善游者沒其船下縻以鉄鎖縱兵擊之溺死甚衆永德解金帶以賞善游者○景德四年先是周與高戰水軍銳敏周人無以敵之帝每以為恨返自壽春於大梁城西汴水側造戰艦數百艘命唐降卒教北人水戰數月之後縱橫出沒殆勝唐兵命王環將水軍自閔河汭潁入淮命趙晁將水軍汭淮而下帝軍於趙步諸將擊唐紫金山寨大破之餘衆東走帝自將騎循

北岸追之諸將循南岸追之水軍自中流而下唐兵戰溺死及降者殆四萬人獲船艘糧仗十數萬後遂克壽州 帝自攻濠州王審琦拔其水寨唐人屯戰船數百於城北植巨木於淮水以限周兵命水軍攻之拔其木焚戰艦七十餘艘斬首二千餘級又聞唐有戰船數百艘在渙水東欲救濠州將兵夜發水陸擊之大破唐兵於洞口十二月克泗州又聞唐戰船數百艘泊洞口上自將親軍自淮北進命太祖皇帝

自淮南進諸將以水軍自中流進共迫唐兵乘勝爭進皆忘其勞且戰且行金鼓聲聞數十里直追至楚州西北大破之擒其節度陳承昭以歸所獲戰船燒沉之餘得三百餘艘士卒殺溺之餘得七千餘人唐之戰船在淮上者於是盡矣。顯德五年上欲引戰艦自淮入江阻北神堰不得度欲鑿楚州西北鶴水以通其道遣使視言不便上自獨授以規畫發楚州民夫浚之旬日而成巨艦數百艘皆達于江唐人大

驚以為神

宋太祖建隆二年正月壬寅幸造船務觀習水戰

己未幸造船務二月丙寅幸造船務。三年冬十月

丙戌幸造船務觀習水戰甲戌幸城南觀修水櫃。

乾德元年正月丙子詔荆南發水兵三千人赴潭州

夏四月庚寅出內府錢募諸軍子弟數千人鑿池於

朱明門外引蔡水注之造樓船百艘選卒號水虎捷

習戰池中命右神武統軍陳承昭董其役十月甲辰

幸新池賜役夫錢丁卯幸新池觀習水戰乾德二年
二月戊申幸教船池三月辛巳幸教船池賜水軍將
士衣有差七月辛巳幸新池觀習水戰八月乙卯幸
造船務乾德三年秋七月己巳上泛舟於後苑新池
賜從官飲丁酉幸教船池乾德四年七月己巳幸造
船務乾德五年二月己丑幸教船池○開寶三年四
月甲午幸教船池七月戊辰幸教船池○四年三月
乙巳幸教船池五月辛巳幸教船池○六年正月壬

申以教船池為講武池。○七年五月丙寅幸講武池
觀習水戰。丙子又幸講武池觀習水戰。七月壬子幸
講武池觀習水戰。初江南人樊若水舉進士不第上
書言事不報遂謀北歸先釣魚采石江上以小舫載
絲繩其中維南岸而疾棹抵北岸以度江之廣狹凡
數十往返而得其丈尺之數遂詣闕自言有策可取
江南 戊辰召若水為贊善大夫且遣使詣荆湖如
若水之策造大艦及黃龍船數千艘將浮江以濟師

也八月己丑幸講武池觀習水戰賜軍人錢甲辰幸
講武池觀習水戰冬十月甲申上幸迎春苑登汴堤
發戰艦東下丙戌幸迎春苑觀諸軍習戰遂幸東水
門發戰棹東下閏十月己酉曹彬等入池州先是上
遣八作使郝守濬率丁匠自荆南以大艦載巨竹絙
并下朗州所造黃龍船於采石磯跨江為浮梁或謂
江濶水深古未有浮梁而濟者乃先試於石牌口既
成命前汝州防禦使靈丘陸萬友往守之丁巳彬等

及江南兵戰於銅陵敗之獲戰艦三百餘艘生擒八百餘人十一月癸未籍奉寧節度使李從善麾下及江南水軍凡千三百餘人為禁旅號曰歸聖己丑知漢陽軍李恕敗江南鄂州水軍三千餘人獲戰艦四十餘艘甲午曹彬等敗江南兵數千人於新林寨獲戰艦三十艘十二月丁未漢陽軍兵馬監押甯光祚敗鄂州水軍三千餘人於北岸丙寅曹彬等破江南兵於新林港口斬首二千級焚戰艦六十餘艘。八

年春正月丙子權知池州樊若水敗江南兵四千人
於州界初曹彬等師未出上命韶州刺史王明為黃
州刺史面授方略明既視事亟修葺城壘訓練士卒
衆莫諭其意及彬等出師則以明為池州至岳州江
路巡檢戰棹都部署辛巳明遣兵馬都監武守謙等
領兵渡江敗江南兵萬餘人於武昌殺七百人拔樊
山寨是日行營左廂戰棹都監田欽祚領兵敗江南
兵萬餘人於漂水斬其都統使李雄甲申王明言敗

鄂州兵三百餘人於江南岸庚申曹彬等進攻金陵
行營馬軍都指揮使李漢瓊率所部渡秦淮南取巨
艦實以葭葦順風縱火攻其水寨拔之斬首數千級
初次秦淮江南兵水陸十餘萬背城而陣時舟楫未
具潘美下令曰美提驍果數萬人戰必勝攻必取豈
限此一衣帶水而怯渡乎遂率所部先濟王師逐之
江南兵大敗江南復出兵將汴流奪采石浮梁美旋
擊破之擒其神衛都軍頭鄭賓七人二月癸丑曹彬

等敗江南兵萬餘衆於白鷺洲斬首五千餘級擒百
餘人獲戰艦五十艘三月乙酉幸造船場庚申曹彬
等敗江南兵二千餘衆於江中擒五百人夏四月戊
辰幸講武池觀習水戰癸丑幸都亭驛臨河亭閱新
戰船壬戌幸都亭驛臨汴觀飛江兵乘刀魚船習戰
五月丁酉王明言破江南萬餘衆於武昌奪戰艦五
百艘六月癸卯曹彬言敗江南兵二萬餘衆於其城
下奪戰艦數千艘冬十月戊午江南僞將朱令斌自

湖口以衆入援號十五萬縛木為筏長百餘丈戰艦大者容千人順流而下將焚采石浮梁王明率所部兵屯獨樹口遣其子馳騎入奏具請增造戰船三百以襲令斌上曰此非應急之策也令斌朝夕至金陵之圍解矣乃密遣使令明於洲浦間多立長木若帆檣之狀令斌望見疑有伏即稍逗遛時江水淺涸不利行舟令斌獨乘大航高十餘重上建大將旗旛至皖口行營步軍都指揮使劉遇聚兵急攻之令斌勢

盛因縱火距聞會北風甚火反及之其衆悉潰己未
生擒令斌及戰棹都虞侯王暉等獲兵仗數萬金陵
獨恃此援由是孤城愈危蹙矣十一月庚辰王明言
敗江南兵萬餘人於湖口獲戰艦五百艘兵仗稱是
太宗太平興國元年十二月戊午幸造船務賜工徒
人千錢布一疋己未幸講武池。二年正月辛卯幸
講武池。七年冬十月戊辰幸金明池觀習水戰。
八年三月癸酉幸金明池觀習水戰。雍熙元年夏

四月乙酉幸金明池觀習水戰謂宰相曰水戰南方之事也今其地已定不復施用時習之不忘武功可

已上
長編

真宗祥符六年詔江淮習水戰於金明池按試立為水虎翼軍以太祖神衛水軍久廢故也

高宗建炎元年六月己卯詔別置凌波等水軍。二年六月戊午言者謂東南武備利於水宜於江上廣造戰艦列於南岸仍防奸人有乘風盜襲之患設不

此圖則寡不足以敵衆步不足以敵騎誤事必矣已
卯詔沿江措置限一月畢。紹興元年五月己酉淮
南劇賊張琪衆五萬渡江寇諸縣進至饒境郡人大
恐統制官閻皇者頓造之愛將也琪恃其衆直犯中
軍臯力戰而揣邦弼兩軍夾擊遂大破之追奔五十
里橫尸滿路賊又別遣精銳為水軍分道而進順浩
自將水軍禦之賊敗走溺死者不可勝計。二年十
二月己巳時鼎寇楊么黃誠聚衆至數萬么主誅殺

誠主謀畫據江湖以為巢穴其下又有周倫楊欽夏誠劉衡分布遠近共有車船及海鰲船各數百隻

李龜年楊公本末曰車船者置人於前後踏車進退皆可其名大德小德山望三州渾江龍之類皆兩重載千餘人又設拍竿其制如大桅長十餘丈上置巨石下作轆轤貫其顛遇官軍船近即倒拍竿擊碎之渾江龍即為龍首每水閩楊公多自乘此海鰲者鰲頭舡也

蓋車船如陸戰之陣兵海鰅船如陸戰之輕兵而官
軍船不能近每戰輒敗大率倫欽雖各有寨而專恃
舡以為強誠衡雖各有船而專恃寨以為固誠寨南
據芷江東北阻湖惟西有陸路又設重城重濠及陷
馬坑衡寨北據芷江東西南皆阻湖誠衡每自說曰
地險如此除是飛來是月詔鼎澧鎮撫使程昌寓與
荆南鎮撫使解潛分遣兵討之既而昌寓奏殺賊五
千餘人○紹興三年四月鼎寇楊么犯鄂荆公安石

首兩縣甲午詔神武軍都統制王璦為荆南潭鼎澧
岳制置使率所部全軍併帶統制官崔增水軍擣其
巢穴仍仰淮東宣撫使劉光世各以舟五十隻與之
○四年十一月時承秦三州各有水寨民兵合力擊
賊庚戌上謂宰執曰淮民未能安業今又遭賊騎乃
力奮忠義不忘國家實我祖宗涵養之力宜與放十
年租稅仍撥錢米助之趙鼎曰陛下德澤如此人心
益固國祚益長矣○五年十月是月館職高閔言太

祖欲平僭偽嘗置神衛水軍至真宗祥符中以兵備
不可廢乃選水卒於金明池習戰棹仍置營池側號
虎翼軍當無事之日尚爾今沿海沿江雖有舟師而
繫于岸下乞時令按習以精其能庶幾緩急可用不
至誤事也○七年閏十月上數令江東宣撫使張俊
盡以舟師分布控扼然後引兵渡江左僕射趙鼎曰
淮西寂然無警似不必爾外間便謂朝廷棄淮西矣
當一向勿顧不發一兵彼未必敢動上以為然○二

十六年九月壬午領殿前都指揮使楊存中言本司
見造戰船乞置虎翼水軍一千人從之。○金亮犯順
至楊林瞰江持軍以為江可渡也李顯忠措畫依山
列馬步軍五分戈船以其二泊於東岸其一泊中流
藏其二於蘆州港中頃之敵麾戰艦渡江呼聲震天
地彼舟及岸敵漸登陸遣時俊王琪盛新載皐張振
張榮逆擊之又疾遣戈船併進以神臂克敵弓射之
敵欲退隨向者江中所匿戈舡出斷其後奪敵船三

十餘艘繼以輕舸縱火焚其戰艦火光蔽江煙焰徹

天亮敗

言行錄

○三十一年十月丙子金亮登壇建黃

綉旗二十張黃蓋亮執小紅旂麾衆渡江時王權所
留水軍車船咸在而諸將未有統屬莫肯用命盡伏
山岫惟提舉張振王琪稍任其責允文自建康因使
人督之賊舟漸近於是振琪與統制官時俊盛新等
徐出山岫列于江岸敵初未之覺一見大驚欲退不
可我軍用海鰲船迎擊士皆死鬪敵舟沉溺者數萬

其回北岸者亮皆殺之遂不能濟允文以其捷聞丁丑敵復來望見車船遽却我軍復以海鰲船先往北岸截橫林渡口用却敵弓射之敵棄船上岸者悉陷泥中而斃上以李橫劉汜等不利急差御營宿衛使楊存中措置守江中書舍人虞允文亦自建康馳至鎮江時江岸有車舡二十四艘敵已瞰江恐臨期不堪駕用存中允文同淮東總領朱夏卿鎮江守臣趙公稱相與臨江按試命戰士踏車船徑趨瓜洲將邊

岸復回敵兵皆持滿以待其船中流上下回轉如飛
敵衆相顧駭愕時金亮已聞李寶由海道入膠西焚
其戰艦而荊鄂成問諸軍方順流而下亮愈忿乃回
揚州召諸酋約三日畢濟過期盡殺之諸酋謀曰南
軍有備如此進有淦殺之禍退有敵殺之憂奈何其
中一酋曰等死求生可乎衆皆曰願聞教其總管萬
戴者曰殺郎主却與南宋通和歸鄉則生矣衆口一
詞曰諾亮有紫茸等細軍不遣臨敵專以自衛諸酋

雖欲弒亮而細軍衛之嚴密衆因謂細軍曰淮東子女金帛皆逃在秦州我輩急渡江汝輩何不自郎主往取之細軍欣然共請亮從之於是細軍去者過半

云云

○乙未諸酋集萬餘人控弦直入亮寢帳左右

親兵散走諸酋射帳中矢下如雨亮即死并殺其太

傅三妃與謀事者十餘人

長編

○烏珠入寇世忠以

舟師赴難烏珠聞世忠在京口遽勒二十萬騎北還世忠遂提兵截大江以邀之烏珠遣使通問世忠亦

遣使報之約日會戰戰數十百合敵終不得渡敵乃
益兵儀真勢接建康烏珠軍其南辣疎軍于北世忠
提海艦中流南北接戰相持四十八日敵自知力憊
世忠舟師中流鼓柁若神生路垂絕乃一夕潛鑿小
河而逃

又言行
錄載此

總論舟師

言舟師於今日當以中興論不當以宋初論夫舟師東
南之長技也國於西北者而用舟師非其所長也亦非

其所恃也昔我太宗嘗曰戈權之戰南方所利今萬邦
平定無所施用但習之不忘武功爾

太宗興國九年事見前

嗚呼信哉斯言是故入夔峽之鎖江用戰權可也今也
捨舟而用步騎卒以勝蜀

太祖征西川命劉光義出夔州路伐蜀上出夔峽地
圖示光義曰夔州有鎖江至此我軍沂流而上謹勿
以舟爭勝當先以步騎陸行出其不意擊之俟其稍

却以戰櫂夾攻之光義等至變悉如上所指

守采石之浮梁用戰艦可也今也捨舟而立檣木卒以擒全斌

開寶七年事見在前

非不用舟師也非其所長則非所敢恃也平河之軍非倔強於海道者乎不出於海道未可以平河名也

江浙發運使楊允恭捕海寇四十九人送闕下上悉貸之顧左右曰此等越逸川澤習性已久可團為一

軍以備舟楫之役以平河為名

水虎翼之軍非隸習於江淮者乎不出於江淮未可以
虎翼名也


祥符六年事見前

用東南之所長而不自用其所長此君子不敢以宋初
為法而必求之中興以後也蓋自六飛南渡駐蹕吳會
守江以為門戶守淮以為藩籬士卒服習唯意所用是
故舟師之効如此君子其可不以中興為法哉江漢湯

湯武夫汎汎經營四方告成于王愚請俟告成之日而

賦是詩

林駟文



羣書考索後集卷四十五

欽定四庫全書

子部

羣書考索後集卷四十六

詳校官中書

臣

寶汝異

主事

臣

祁韻士覆勘

總校官知縣

臣

楊懋珩

校對官中書

臣

徐步雲

謄錄監生

臣

陳國遴

欽定四庫全書

羣書考索後集卷四十六

兵門

宋章如愚編

文王之時西有昆夷之患北有獫狁之難天子命將帥
遣戍役以衛中國歌采薇以遣之

戰國齊威王有檀子守城南盼子守高唐黔夫守徐州

而楚趙燕不敢寇邊

李牧之為趙將居邊軍市之租皆自用饗士不從中決
故能北逐單于破東夷滅澹檻西抑強秦南距韓魏後
趙王用郭開之讒誅李牧而令顏聚代之是以為秦所
滅

通鑑

秦并六國廼使蒙恬北築長城而守藩籬卻匈奴七百
餘里

晁錯曰秦築塞河上置戍卒焉非以衛邊地欲廣大

也

漢興與匈奴和親至文帝時背約入寇帝令邊備守不發兵深入又以蘇意屯句注張武屯北地周亞夫次細柳劉禮次霸上徐厲次棘門以備之

匈奴傳

帝自為代王

已習知邊事故於邊備尤留心焉 三年匈奴入居北

地河南為寇上幸甘泉因幸太原十年行幸甘泉 十

一年幸代 十五年幸雍 後元二年幸雍櫟陽宮

三年幸代 四年幸雍 五年行幸隴西又行幸代數

卷四十六
行幸邊上又躬自勞軍勅兵故當帝之世雖匈奴犯邊而不為害

時晁錯上書言備邊之要又陳募民守塞之策

武帝遣韓安國屯漢陽郭昌屯朔方又遣徐自為築五原塞皆築外城設屯戍以守之

景帝時言陛下幸憂邊境遣將吏發卒以治塞為之高城深塹具蘭石布渠谷所以備其要害之處為之相其陰陽審其土地以裂里割宅所以使民有長居之心自

昭帝以後匈奴畏中國之威希犯邊境而款塞稱藩
矣

匈奴傳陳彥羣曰漢鴈門雲中以備北狄隴西諸郡
備西羌巴蜀諸郡備西南夷遼東燕齊諸郡備朝鮮
會稽諸郡備南越此邊備之大凡也

後漢光武中興邊往往置郡尉

明帝之初以為野無風塵乃悉罷沿邊屯兵永平八年
初置度遼將軍屯五原曼桓募郡國中都官死罪繫囚

減等諸度遼將軍營屯朔方五原之邊縣妻子自隨便
占著邊縣父母同產欲相代者悉聽之亡者贖罪各有
差凡徙者賜弓弩衣糧

永平十六年詔郡國中都官死罪繫囚減死罪一等各
令詣軍營屯朔方燉煌妻子自隨父母同產欲求從者
悉聽之

章帝建初七年詔天下繫囚減死一等詣邊妻子自隨
占著所在父母同產欲相從者悉聽之 其後北胡有

變則置度遼營南蠻有變則置象林兵

永平置羗犯三輔則置長安雍二尉鮮卑寇居庸則

置漁營安帝之後又盜作沿邊緣海

順帝始令沿邊增置步兵緣海屯兵而益多矣

兩漢兵制

永和五年令扶風漢陽築隴道塢三百所置屯兵。又

詔魏郡趙國常山中山繕作塢候六百一十所

西羗傳

晉武帝時羊祜修德信以懷吳人與陸抗對境抗告邊
戍曰彼專為德我專為暴是不戰自服也各保分界而

已通鑑

宋文帝每歲為後魏侵境令朝臣議何承天陳備邊之要一曰移遠就近以實內地二曰浚後復城隍以增垣防三曰募偶車牛以飭戎械四曰計丁課役勿使有闕

邊防拓跋氏篇

唐武德初改郡為太守為刺史其邊領及襟帶之地置總管府以領軍戎七年改總管府為都督府因隋末分割州府倍多前代貞觀初并省州縣始於山河形

便分為十道

通典

唐初安東安北安西皆置都護府意其戍兵之數不少矣

太宗威加四夷舉三邊十萬而足其後李林甫邀人主以邊功而三邊之師四十九萬戎馬八萬餘疋

說齋

又太宗嘗謂李勣曰煬帝不擇人守邊以備虜今用勣守并突厥不敢南賢長城遠矣

中宗詔張仁亶為總管屯邊始築三受降城於河外

突厥

傳

代宗時郭子儀屯邠州李抱玉屯高壁馬璘屯原州李忠臣屯涇州李忠誠屯鳳翔臧布遜屯渭北備虜之入

吐蕃傳

德宗西北有防敵之地時陸贄謂中國守備易用所長八利可致六失可去帝重其言而不行

夫所謂方鎮者節度之兵也原其始起於邊將之屯防者唐初兵之戍遠者大曰軍小曰守捉曰城曰鎮

而總之者曰道自武德至天寶以前邊防之制其軍城鎮守捉皆有使而道有大將一人曰大都督至太宗時行軍征討曰大總管在其本道曰大都督自高宗永徽以後都督帶使持節者始謂之節度使然猶未名官睿宗景雲二年以賀拔延嗣為涼州都督河西節度使自此以後朔方諸鎮皆置節度使自祿山結亂肅宗始徹邊備以靖中邦借外威以寧內難於是吐蕃乘釁回紇矜功中國不振四十餘年使傷耗

之民竭力奉職西輸賄繒北償馬資尚不足塞其煩
言滿其驕志於是遠徵士馬列戍疆陲猶不能遏其
奔衝止其侵侮小入則驅畧黎庶深入則震驚邦畿

陸贄
奏議

宋朝國初以勇悍忠實之臣分控西北邊孔道何繼筠
守滄景李漢超守關南以備北敵郭進在邢州以禦太
原姚內斌守慶州董遵誨守通遠軍以捍西戎故二十

年間無西北之憂

兵制
序

太祖建隆二年初五代募民盜戎人馬官給其直籍數以補戰騎之闕上欲示信保境戍戍敕沿邊諸州禁民無得出塞侵盜前所盜馬盡令還之由是夷狄畏慕不敢內侮

長編

○上嘗語近臣曰安邊御衆須是得人若

分邊寄者皆稟朕意則必優恤家屬厚其爵祿多與公錢及屬州縣境四圍免稅聽其召募驍勇為之爪牙苟財用豐盈必能集事朕雖減後宮之數極於儉約以備

邊費亦無辭也

寶訓

太宗端拱中北人寇邊張洎奏請聚兵積穀分屯塞下來則備禦去則勿追

武畧

○淳化元年上召中丞王化

基問以邊事化基曰天下所患根本未固根本固則枝幹不足憂今朝廷治則邊鄙何患乎不安

長編

太宗每選將帥鎮撫邊郡為制敵之策其後戎狄稍稍罷去戰士保境自守因對近臣語其事寇準曰陛下長駕遠馭動有節制今中原綏靖邊城晏閑皆審筭使然

寶訓

真宗謂近臣曰邊防當常全葺積穀聚人不可弛也又咸平中邊兵未息上與李沆等議禦戎之計分遣白守素屯威虜軍楊延昭屯保州田敏屯北平寨以當敵鋒始至勿與聞待其氣衰使之奔命不暇又命裴自榮屯寧遠軍張繼旻屯邢州扼東西路戎寇及澶淵之幸王師大捷又楊延昭等諸將各握兵在邊扼其歸路狄人勢屈遂乞和

寶訓

○咸平三年真宗問王濟以邊事濟

曰陛下承二聖之基擁萬方之衆茲者契丹敢爾憑陵

蓋謨猷當位之臣未有如昔人者衆皆謂國家所恃獨
洪河耳此誠急賢之秋不然臣懼狄人將飲馬於河渚
矣退而纂備邊策十五條以獻上曰近聞西戎之剽皆
不利而去王師所獲俘馘甚衆然朕以戒疆吏但謹烽
候嚴卒乘來即驅逐去勿追捕乃遣使與邊將議靈州
悠久之便庶令關右之民有以息肩

寶訓

○景德三年

上曰比詔河東募土人為廣銳神虎諸軍就置營宇蓋
以契丹未平此等皆勁勇且習知山川道路故帥臣每

患其少嘗許續募令邊防罷警若遂令減去即為弛備
然豈可歲增不已乃詔以見存為定額缺則補之

長編

○夔州轉運丁謂言近於施州南界建柵立扼要害益
師屯戍慮難供饋復置屯田歲獲資糧足以贍給可省
輦運之費謂因言邊防要害若所委之官不邀功不生
事常以安靜為勝悉依詔條撫理制置則蠻獠不敢為
非上曰比來邊境不寧多由守臣生事况條制甚明奉
而行之必無事矣

長編

○時秦州掩殺蕃兵萬餘上聞

之顧左右曰蕃部撓邊掩殺固其宜矣苟能靜守封疆不令侵軼此尤佳也

全上

仁宗慶歷三年諫官歐陽修言朝廷與契丹通好僅四十年無有纖介之隙而輒萌奸計妄有請求切以戎狄貪婪性同狼犬遇強則伏見弱便欺臣竊怪在朝之臣尚偷安靜自河以北絕無處置因循弛慢誰復掛心豈可待北使在廷強兵壓境然後計無所出空務倉皇而已哉

同上

○慶歷四年樞密副使韓琦參知政事范仲

淹並對於崇政殿上言四策曰昨元昊叛命王師數出
不利而北國舉數十萬衆謂元昊是舅甥之邦中國不
當稱兵國家以生民之故稍增金繒以續盟好今元昊
雖暫求通順得知物力稍寬則又有長驅深入并吞闕
輔之心何以知之昨定州之戰彼作偽詔誘脅邊人欲
定闕中為今日之謀者莫若擇帥練兵日計用武之策
以和好為權宜以戰守為實務彼知我有謀有備不敢
輕舉而盟約可固如不我知輕負盟約我則乘彼之驕

可因可擊未必能為中國之患

長編

○參知政事范仲

淹言契丹元昊有六可疑三可憂今乞聖慈顧問大臣如契丹可以保信必不入寇亦不與元昊連衡則乞今日同署一奏納於御前使中外安靜不更憂疑他日或誤大事責有所歸如大臣不敢保信則乞指揮大臣今日更不歸廳便畫河東禦捍之策抽何路軍馬用何人將帥添若干錢帛據何處要害如此定策猶恐後時不能當二敵之勢或更因循度日直候大寇入境然後為

謀則河東一傾危逼宗社極論不敢有隱惟聖斷處之
同上○先是范仲淹受命主西事富弼主北事弼條上
河北守禦十三策曰宋朝以兵得天下震耀武威

太祖皇帝待北國僅若一族每與之戰未嘗不克

太宗皇帝因親征之勦敵志遂驕頻年寇邊勝敗相半
真宗皇帝嗣位之始專用文德於時舊兵宿將往往淪
沒敵騎深入直抵澶淵河朔大騷乘輿北幸於是講金
帛啗之之術以結歡好自此河湟百姓幾四十年不識

干戈歲遣差優然不足以當用兵之費百一二焉則知
澶淵之盟未為失策

同上

河北三十六州軍內沿邊次邊如北京雄霸祁保瀛莫
滄定鎮冀十一州廣信安肅順安信安保寧乾寧永寧
七軍總一十九城皆要害之地可以控制敵人而不得
深入矣定為右臂滄為左臂瀛為腹心北京為頭角此
四城者河朔之所望也餘十五城為指爪支節乃四城
之所使者定滄瀛各置一帥北京置一大帥餘十五城

分屬定滄瀛三路悉擇善將守之十九城都用兵三十萬此三十萬兵非如景德年中閉門自守皆使出而接戰者也頃年大兵悉屯定州然閉城不使出戰者蓋恐一敗塗地無所救援且防中渡之變也今雖用兵三十萬而分置十九城左敗則右救從失則橫援豈有昔時之虞邪其外十二城不復蓄兵只以本郡鄉兵堅守不使出戰同上。○河朔州軍長吏最宜得人以備匈奴之變自來都不選擇賊污不才年老昏昧者盡使為之又

移替不定久者不過一二年其間苟且之人只是幹尋常之務其經久利害自知不及其身率皆不為前後相承積弊已甚若不選人久任以矯前失則異日敵有變故邊城不守浸淫深入為患不細

同上

○除上件十九

州軍寨長吏以下並乞詔本路轉運提刑安撫部署鈐轄分擘舉充仍委樞密院三班審官銓司選舉不許循入並須三年一替所貴上下得人衆職皆舉用兵之際有可供使與夫臨時外求得失拒萬也

同上

○臣頃聞

河朔人說契丹自山得斬伐林木開鑿道路直抵西山漢界而止今則來往通快可以行師臣亦細詰其由云契丹舊亦疑朝廷復燕且恐天兵渡界河直北趨燕京則敵人欲出我不意由山後進兵旁擊鎮定橫行河朔牽制王師以解收燕之患也當得能幹而謹密者陰往經制如何屯戍如何捍禦必有可以勝之之術先事而定以待其來則保邊之道也漢唐以來匈奴入寇率由上郡鴈門定襄等路蓋當時中國拘全燕之地有險可

守匈奴不敢由此路而來也。自石晉割燕薊入契丹，無險可守。由是敵騎直出燕，不復尋定襄等故道。今朝廷若留意河朔邊鄙，有備敵不可得而入，須求別路以來，或雖可入，寇第取定襄等路為犄角之勢，則河東不得不大為防。或剏立城池，或造設險阻，何地可以設奇伏？何路可以出牽制？此須預經度，素有防備，則臨時足以禦捍，應卒不至倉皇。使與河朔表裏相應，寇不能逞其欲，實邊防之急務也。自契丹侵取燕薊以北，拓拔自

得靈夏以西其間所生豪英皆為其用得中國土地役
中國人力稱中國位號方中國官屬任中國賢才讀中
國書籍用中國車服行中國法令是二國所為皆與中
國等而又勁兵驍將長於中國中國所有彼盡得之彼
之所長中國不及當以中國勅敵待之庶幾可禦豈可
以上古之夷狄視彼也。范仲淹言今北國西戎合謀
并力夾困中原西兵數年未能平定近方遣使往復以
議通順餘可假借以成和好然後重議邊事退移兵馬

減省糧草蘇我生民勤我稼穡選將練士使民強兵銳以待四夷之變此帝王有道之術社稷無窮之福也

同

上○范仲淹言麟府二州所修堡寨只通得麟府道路其四路別無城寨防守因奏張亢得以增廣堡寨宜使就總其役詔既下而明鎬持不可屢牒止亢亢曰受詔置堡寨豈可得經畧牒而止耶坐違節度所甘心堡寨必為也每得牒置案上卒事乃發封自劾朝廷不問編漢歸者數千戶歲減戍兵萬人河外遂安

長編

○慶歷

六年詔陝西河東經畧司西人雖納款稱臣然犬戎之心詭譎難信恐諸路乘罷兵之後漸弛邊備其益務練兵卒完城壁常若寇至有不如詔者亟以名聞同上。

至和二年先是潘美帥河東避寇抄為已累令民內徙空寨下不耕號禁地而析代州寧化火山軍廢田甚廣歐陽修常奏乞耕之詔范仲淹相視請如修奏尋為明鎬沮撓不克行及韓琦至遣人行視曰此皆我腴田民居舊迹猶存今不耕適留以資敵遂奏募弓箭手居之

會琦去即詔弼議弼請如琦奏凡得戶四千墾地九千六百頃同上○又嘗謂馬知節曰邊防禦戎之術何者為先知節曰邊防之地橫亘雖長然據要害以拒其來惟順安軍至西山不數百里

神宗元豐四年八月上謂大臣曰自來邊探多不得實如廬南興師人言旁邊百里內林菁險阻道路難進今得走馬奏大兵至落茹兒村乃有良田萬頃頗多積穀其林菁乃在數百里外去邊百里之間探報尚且如此

乃知傳聞多不足信昔趙充國願至金城圖上方畧馬
援聚米為山川蓋傳聞不如一見爾

長編

哲宗紹聖元年七月三省樞密院同對以熙河路安撫
使蔣之奇所奏攻守和三策進讀于前李清臣奏曰攻
所言春秋左氏用三師以疲楚者固為上策然慶歷中
元昊寇邊韓琦范仲淹嘗獻議近邊屯勁卒為三屯互
出擣虛使羗人並塞不得耕收乃制勝之道計已定會
元昊乞和章惇曰先朝是淺攻法及擾耕硬探但使旁

邊一二百里羗人不敢耕則自當困弊故制羗之要數
出有利制敵無如淺攻最良曾布曰此但殘夷老幼甚
可傷上曰豈吾人所欲哉蓋為彼殺掠我老幼如河西
被患尤酷故不得已報之使懲創冀不復來爾非欲殺
也

高宗紹興八年九月辛丑進呈新除沿邊守臣王黼等
上宣諭曰今日邊壘內則綏撫外則斥候二事至大未
易得人宜精擇之上之留意政事不間遐邇皆得其要

○二十九年十二月甲寅進呈楊杭探報北界揭榜禁
妄傳起軍事上曰此事有無固不必問朕觀其科擾勞
役民不聊生豈是長久之道朝廷但當精擇牧守務為
自治安邊息民靜以待之爾

並同上

孝宗除葉顥告詞方今敵國雖和而二備當戒

冗兵

三代之時未嘗無兵也今以漢志攷之云三代王者萬
乘之兵甲士三萬卒七十二萬可謂衆矣當時不謂之

冗者蓋寓兵於農無坐食之兵也

漢京師南北二軍數僅盈萬至於羽林期門之屬數猶未振

漢高祖以二十萬入秦關

武帝以十八萬騎巡北邊亦不謂之冗者置材官於郡國有事集兵事已則罷也杜佑通典謂漢氏重兵悉在京師今以百官志攷之光祿勳有衛士八十一人虎賁千五百人羽林郎百一十八人羽林左騎八百人羽林

右騎九百人惟三書郎無員計亦不過千人官表云諸郎多至千人總而計之為四千三百九十九人衛尉衛士衛卒六千人南宮北宮衛士共一千八人右都侯左都侯衛士共二百九十九人宮掖凡七門各有司馬以領衛士南屯百二人蒼龍四十人元武三十八人北屯三十八人朱雀二百四人東明百八十人朔平百二十四人總而計之為一千五百一十三人北軍五校所以領騎士如屯騎越騎步兵射聲各領七百人長水領七

百三十人又中尉緹騎五百二十人總而計之為四千五十人惟城門屯兵數無所攷以官掖司馬所領者論之多者百八十人少者三十八人況十二門止領於一校必無重兵恐多不過千人爾總是四者而計之則京師之兵僅餘萬人然此是中世以後之制若高文之世未有羽林虎賁未有七校則其數當益少也其兵何自而冗哉

唐府兵既罷之後所謂神武神策騎兵不過十數萬而

觀察節度之師犄角於天下大邑通都皆宿兵而長慶之數無慮百萬太計以三戶資一兵焉

唐高祖自太原發兵三萬及起義兵得兵二十萬及天下既定其願留宿衛者僅三萬人

太宗列置府兵六百三十四所在關中乃居三百六十有一凡府三等兵千二百人為上千人為中八百人為下又府兵之置無事時耕於野若四方有命則命將以出事解輒罷兵散于府矣其兵亦無自而冗也中世以

來兵始冗矣

玄宗時張說言宿衛之士至三十萬天寶元年置十節度經畧使以備邊凡鎮兵四十九萬人益兵浸多矣
憲宗時宿兵見在可計者八十餘萬其後蕃鎮各擁兵
自強天子自置兵於京師不勝其冗矣

五代之際四方割裂以區區中州之地

晉漢之兵嘗至於數十萬養之既費教與用之又皆不
得其理

周世宗自高平之戰始知其弊乃曰今兵務精而不務多以農夫百不能養甲士一安用浚民膏血養此無用之兵於是簡去疲弱止存精銳故能北走三關南定淮南

宋太祖鑒前代之弊益修教習之法黜疲懦初得周代之兵中外總一十二萬後平全蜀止揀其精銳百二十人則江南嶺南諸國可知矣。及乾德中揀成十萬富弼之語兵數既少故月給之外時有賜予由是兵不貧

乏而銳於役使力既強壯而勇戰鬪藝祖之所以平五
強國者用此道也姚內斌領慶州董遵誨領環州夫以
折衝方面之任而所領之兵纔五千而已當

開寶中秋三萬寇定州太祖詔田欽祚領兵三千赴之
大敗狄師則其應敵之兵又不過如此當時中外之兵
其數可知。至太宗伐劉繼元駕前之兵蓋十餘萬兵
稍稍益多矣其後曹彬之敗祈溝關也在行之兵實二
十萬

富弼云太宗有天下添兵至三十萬

真宗全盛時亦不過五六十萬西邊警之後募兵其
移募兵日廣

仁宗時遂至百餘萬

龐籍汰兵疏云夫寶元中騎兵捧日之外所增一百
六十二營步兵天武之外增七百五十二營而代郡
泃邊泃海所增不下數十萬自是增兵至百餘萬

孫洙號善論兵其論宋朝兵曰古者兵一而已今內外

之兵百餘萬而別為三四又離為六七別為三四禁兵也廂兵也蕃兵也離為六七謂之兵而不知戰也給漕輓者兵也服工役者兵也繕河防者兵也供寢廟者兵也養國馬者兵也疲老而坐食者兵也前世之兵未有猥多於今日也蓋今天下嘉祐中戶口千有餘萬而皇祐一歲之入一億二千六百餘萬耗於兵者常十八而留州以供軍者又數百萬總戶口歲入之數而以百萬兵計之無慮千戶而資一廂兵十萬而給一散卒其兵職

衛士之給又浮費數倍何得而不大感也

仁宗至和中諫官范鎮言兵不在衆在練之與將如何耳儂智高反前後遣兵不知其幾亡命奔北不可勝數狄青請用蕃落廣銳車卒以數百騎取勝又言備契丹莫若寬河北河東之民備靈夏莫若寬關中之民朝廷之憂不在四夷而在冗兵與窮民也

神宗熙寧中裁減廂軍汰去禁卒之老弱者併營以省將校時有司會一歲所省以緡計者四十五萬以石計

者四十萬以足計者亦二十萬而西域諸國皆來朝貢
夏人之款益恭契丹之盟愈固且談笑而復熙河

後漢光武以三千之衆敗尋邑百萬之師謝玄以精
卒八千敗苻堅百萬之衆曹公赤壁之戰亦八十萬
而不能敵周瑜之三萬趙括長平之戰蓋四十萬束
手以就坑然則師不在衆亦明矣

羣書考索後集卷四十六